

寓

林

集

寓林集卷之十九

武林黃汝嘉真父著

誄

居烈婦誄有序

夫朝秀之華不以溫風加勁獨挺之幹不以冽霜受彫故士矢匪躬之蹇女貞不貳之儀卓軌閨房弘規區域第介非性敦事有偶迫或罹崩析之會激哀殞軀抑困顛沛之遭沈憂畢志斯之抗厲已邁塵流疇與徘徊歲時從容履蹈託體千秋酬心一往如居烈

婦者可勝悼乎居烈婦者鹽官諸生居仲子翼隆之
妻郡伯省心居公介婦而西吳觀察茅公鹿門先生
少女也仲子卒于館甥烈婦未離愛女且三年婺處
哭泣非新子女依棲春秋有託義在未亾身應惜歿
而烈婦蘭紉不移栢舟永矢接芳華萼生存仲子之
孤掩泣黃壤歿許居郎之婦撫枕積痛展墓沉哀穴
泉臺之與同含笑入地經溝瀆而非諒用報所天乃
以己亥三月十三日縊于房寢得年若干義不隕貞
權不失重豈與夫抱媼思于瑟琴迫窮慘于焚溺風

飈電鑠氣決衡命者哉嗟乎烈婦有歸居生不歎
以累善用揚芳魂其辭曰

嶽靈川秀濬毓人倫貞觀秉耀擢爲女英女英伊何
實居之媛則閔非儀種植聖善伏書班史蘭芬玉彥
太守崑圃觀察藍田擇記允良館甥惟賢投佩仲子
結襦茗川茗川熾婉寒暑三匝伯鸞眉案曰季田鑑
憐仲也才砥仲於學傷逝者舅永言諸姑執巾于歸
婦婦夫夫蘋蘩薦信閨牖遠圖遠圖何爲偕歸偕好
顯則謝娥隱亦龐媪女箴婦規奉以終老曾是不天

而仲蚤天嗚呼哀哉日不酬算情不愜緣白頭失吟
青鬢何顏一慟幾絕三尺欲捐幾絕而甦母氏慈誘
曰子伊女未離懷袖仲胤不延孰孰其咎宛轉悲緒
沉洄幽衷一言破涕動復從容從容如常匪曰無情
存我藐孤託我仁兄未亾寡妹不亾居生嗚呼哀哉
轉亾而存僉曰婦慧孰知悠悠形專神悴咄咄私語
忽忽永喟託體于幽結夢於寐嗚呼哀哉寐兮俄寤
夢也非真夜臺不旦冥漠誰親雙魂不俱孤魄虛扁
嗚呼哀哉風雨暮春涕淚寒食草木露零松楸煙集

擗標長號音塵寂
聞嗚呼哀哉孤存仲存仲
凶我凶青塚有人玄宮可藏
崩城哭杞泛舟誓姜生輕義重
綆促心長嗚呼哀哉娥月皎寒
婺星絢綵桃葉乍彫松姿常在
傲日凌霜高風絕代彪炳二門
懿鑠千載嗚呼哀哉

哀辭

項貞女哀辭有序

項貞女者秀水人父某許字吳江周孺文歿之者也
凡百君子莫不珍其芳潔美其從容褒著文采彪炳

人倫而曲士謬束中庸嗤其苦節嗚乎不食祿者非
王臣耶謂未爲孺文婦也者弗歿孺文也能爲孺文
婦也者可後孺文歿也是西山無餓夫之薇延陵無
季子之劔也嗟乎歿生大矣名義邈然夫杞哭崩莒
思婦之極哀聶屨暴韓俠魁之餘烈猶愴然悲壯想
見其爲人况貞女哉余故憐而歌之非能擬騷人之
賦聊以抒棄士之悰焉耳

媛媛兮淑女言歸兮于周衿襜兮未結伉合兮將謀
吉日兮辰良于飛兮綢繆旻天兮不弔君子兮離憂

驚聞兮潛怛慄慄兮含愁藥石兮亾從素心兮有求
顛哀哀兮蒼蒼穆默默兮玄脩倘百季兮有期願一
七兮夷猶嗟夫夫之不辰兮季之弗將賈諡才而蚤
夭兮子淵詰而云亾頽玉樹之先摧兮稿蘭茝之芬
芳寂憐憐以來訃兮孰知余之芴皇將呼天以長號
兮碎裂其腸羗大人之我珍兮厚余之防黯黯飲泣
兮心獨語魂兮其徠兮吾將與侶眇眇愁雲兮憐其
暮白日不再兮余又曷顧盈盈綠鬢兮誰則予憐余
亦愛吾指兮誰爲織織爲玉而碎兮將瓦而全雙翼

既折兮將焉翩翩
窅窅隻目兮于何流連
傷哉栢舟兮亦孔之賢
余亦婦人兮何獨不然
苟厥身之靡二兮胡問爾之色
顏魂兮其亾馳兮余斬及爾於黃泉
神芻芻其不寐兮悽長夜之杳杳
彼蚩蚩之莫予防兮惡知予之皎皎
倚闌干以徘徊兮愀余心之渺渺
魂兮余其偕往兮亦何呂異乎偕老
款悲風兮蕭蕭魂怳怳兮搖搖
睇孤燈兮無色撫哀琴兮不調
奏一曲兮音絕腸九迴兮欲裂
紉素絲兮爲佩軫余懷兮如結
騁松陵兮漠漠惟荒忽兮纍咽
望夫君兮太息

乘冥冥兮余接儵西徂兮之東生不同衾兮歿兮同
穴亂曰飛鳥于歸兮反乎故鄉狐歿晉丘兮貞余之
所藏翱翔大化兮爲鸞爲鳳精氣無不之兮爲水爲
霜且暮于秋兮振振三綱秀川泠泠兮清標孔揚

吳母孫孺人哀辭有序

吳母孫孺人者錢塘故處士中洲先生之元配而茂
材吳子之鯨之母也相夫起家成子服孺廣心淑才
清閨宏範行年六十以萬曆乙未七月十五日卒于
燕寢素風頓隕貞魂莫招家墜陰儀邦失名媛之鯨

痛浚靡依充充皇皇手抔捲而澤新撫梳篦而腸絕
情罔有極禮亾不歸將以是年某月某日殯于某山
之麓翠帟過行玄扉疾掩凌淒淒之霜風咽噉噉之
夜猿聲客邈矣逝川之水不停聖善依然屋梁之月
彌耀馨郁烈之可尋儼徽音之未泯友人黃生比于
猶子之誼爲略節志凡噉哀賦些匪其文辭以代號

慟云爾辭曰

翳龍門之遙緒兮託江潭以攸生皎皓皓之胎質兮
內含美而脩能凜禔躬以肅規兮自天性而少成匪

女紅之纘織兮亦徽圖而觀史旣靜好而無非兮又
聃聃以習事揆兩美之有合兮約氏告之曰延陵筮
靈氛之吉占兮欣于歸而鼓瑟言佩讓而執筭兮儼
穆穆而森森人言伯鸞之與德曜兮相鑑敬而如賓
潔洎泚以精禋兮詠中谷以積居脫簪珥而靡辭兮
敬先人之故廬念年短而心長兮新承歡于庭闈歲
月忽其不居今日踳踳而下頽旣天傾而地折兮傷
夫君之毀哀顧壘壘以奄奄兮將無從之泉臺日呼
號以籲天兮余不忍離此苦也脩藥餌與筦簫兮匪

其躬之恤也歷十六年其一夕兮愉夫君之霍然濱
九歿而獲存兮又壁立而磬縣曰廢興之自人兮抑
胡爲乎心煎捐繆綢之所構兮畱先人之一椽維澤
國之近三倍兮乃駕言乎萃亭夫夫孱孱而不任兮
手代操其奇羸徵貴賤以會時兮燭遐方于睂睫握
千指以紀綱兮流萬貨其靡絕匪嗃嗃以顛成兮用
蒸蒸而起業計生事之漸豐兮懷故園之爲勞彼飛
鳥之棲舊林兮亦何戀乎錐刀乃攜手以言旋兮營
菟裘而燕喜歡未足而哀禱兮夫竟積糞而不可起

江蒼梧之未卽從兮差還正夫晉丘不難攀墓冗以
頌軀兮護藐諸孤之千秋鳳采采以色飛兮駒矯矯
而血汗噫孺子其蚤慧兮浩披經而弄翰模人倫以
爲楷兮軼才士而抗顏據臯比以橫座兮將名滿于
中區每坎壈而失職兮繼要裏而鹽車世僉謂廓落
而難卽兮獨摩娑而于于曰女苟爲世之聞人兮亦
何恤乎馳驅幸予精之未銷亾兮肆窮愁而著書聽
卑音之闐闐兮欣挫薦而秣馬生何必于富貴兮期
冢士以上下泊季春之三月兮逢懸帨而辰良錯玄

黃以充宮兮曳珮服而焜煌客駢集之如雲兮子姓
列而成行竟脩爵以起壽兮翁吹笙而鼓簧渥笑言
之宴宴兮俄慘紆而鬱傷唉孺子之亾墜前脩兮緬
懷夫君之弗將嗚呼哀哉樂未極而悲生兮忽辭夏
而狙秋彼豐頤而疆質兮胡一疾之弗瘳將神用之
漸敝兮抑時命之不道懷琬琰而黯黯兮銷芳魂于
蕙樓嗚呼哀哉履寒霜之淒清兮溘埃風以西征颯
落木之蕭蕭兮慘長江之秋聲攀素軒而莫挽兮望
玄宮之冥冥靈輜夕引于山陽兮騎乘朝闕于墓阡

魂搖搖其亾不之兮會同冗千重泉亦知薤露之塵
弗曉兮盟猿鶴于千年獨悲聖善之失女刑兮贖百
身而莫延爾胤長號以陟岵兮籲昊天而哀嬋左右
伏聽而流涕兮矧親執紼于臯原結松楸之重陰兮
激寒泉于回波指碑金而侈頌兮銘俊德于素絨曰
鮑婦之與陶母兮表碣石而不磨叩几筵而訴哀兮
神姦舉而來過

張鄧西先生哀辭有序

明通議大夫觀察廣西鄧西張先生行年八十有三

以萬曆乙未夏五月壬午二十四日丙申卒于通德里第嗚呼哀哉天喪斯文星殞執法典刑崩墜溟溟邈廓盛德就徂大運舛錯某結知胤子爲恭父行聞杖良以逍遙捐身莫贖瞻山頽而嘆息揮涕何從慙無有道之碑不禁西州之慟累德鮮舉空寄慨於千秋贈終以哀聊送情于一往不腆蕪辭識其大者云

爾

嗚呼哀哉江山巨麗蔚有聞人張仲孝友世胄神明於越降嶽慈水滄靈貞道弘範篤祐先生八歲解文

五行俱下氣可食牛才幾倚馬齧齕試邑振聲膠庠
弱冠奮筆爰舉於鄉纍纍千言江都洛陽挾策公車
釋褐西曹陸離雷劍發硎庖刀八法是比三尺莫撓
盤根錯節大獄橫興建昌被逮慈養不寧聖怒巨測
臣法惟平有虞咎繇在漢田叔折衷情法保全骨肉
母后安席乃公禍叢天子薄罰謫尉於東厲節比霜
薄氣成虹嗚呼哀哉公境轍軻公心剛方謫尉尉理
遷令令良再擢郡丞三徙南郎講學循義名烈行芳
嗚呼哀哉良知証宗大名出守焦勞赤心許安黔晉

清白彈冠貪墨解綬潁川避席南陽讓右嗚呼哀哉
惟公治平九卿可踐俗議故常閩海司憲公負不凡
公事每奇文衡髦俊武靖島夷天子曰都詔賜有差
甫釋南閩復憂西粵蒼梧陸梁志必殲滅滌蕩七山
芟艾羣寇奇計全收膚功中逗曾是萋菲譽不勝咎
捫心介推搯擊延壽嗚呼哀哉人爲太息公獨夷然
洋洋泌水萋萋丘園功忌名顯身隱道尊嗚呼哀哉
太丘長者郭泰人師垂法微言貞軌良知正家諭俗
明道弘慈長算引年精心獨苦焚脩清獻琢磨衛武

是室永生胡然終古嗚呼哀哉東嶽摧峰長江晒流
百年猶促三公未酬閔寂一棺奄忽千秋嗚呼哀哉
素車躊躇白驥哀鳴存亾路岐形神湮沉仰悲往哲
俯慙後生竊附令子砥行立名顧影若惕拊心若崩
嗚呼哀哉

祭文

祭少司寇韞庵吳公文

少司寇韞翁吳師之辭人間世也錢唐郡門人黃某
聞訃意傷號天無從時維九月秋氣悲瑟悽愴彌深

乃祭酒涉江爲辭以哭之曰嗚呼哀哉維洞庭之微
波兮紛木葉其將脫飄繁霜之霏霏兮傷憂心其如
憊九京兮不可作兮莽長江之浩浩問至人之所居
兮檝蘭旌兮桂棹皓太白之旣夜隕兮眇落霞之焉
薄願一見而無期兮閔余心之所服撫往事而馮忡
忡兮披遺風於芳躅憶吾師之守吾土兮及余髮之
髻年伊囁嚅於毫端兮翳毛羽之未全彼鳧鴈翩翩
而願登樓兮余惶惶其焉集師兮張絃而目之兮遂
矯首而舒翼夫旣被余以青衿兮揚余以修名亦解

衣而授餐兮高寥廓其相矜世僉託吳公之得士兮
余實汗顏於賈生歲冉冉其不居兮采蘭蒨而不芳
令騏驥躓而中道兮亦奚貴於九方衆申申謂鍾期
之失聽兮濫巴歌而吹之師握余手而太息兮士遇
合之有時歷執憲而屏藩兮築周召而作度翼東南
以嗅麻兮固羣心之之所附眇何有於賤士兮騰戀
戀其如故彼侯嬴之未虛左兮迨郗生之幕賓祇綯
繆於須臾兮是惡知斯之深情余嗷嗷若弱兒之怙
慈母兮謂寇公之可畱帝簡在以錫命兮指干旋

而中洲黯魂銷而感愴兮慘離歌兮渭城瞻德星之
馳照兮悵仁風之遐征猶曰撫此方寓兮紉禁帶之
一席鬱寥廓而結思兮駕千里其奚惜天蓋假余以
良緣兮矯鵲起而扶搖將僕夫超燕以馳衛兮訴余
衷之怊怊嗟楊朱之泣岐路兮麗行人之參商挈馬
兔而徑北兮遙隔絕兮清光眷德音之不遐遺兮繫
鴈足以南下長相思而策余驚兮冀空羣於北野侷
鬱邑余侷僚兮蹇余足其不前將遄歸以瞻河洛兮
倪班如其屯邗 帝忽晉師以司寇兮爲天下平嗟

王路之多艱兮詢老成之典刑世僉微瑋而厚託兮
寧獨余之殷殷羗生命之不造兮壽不竟才天傾東
南兮龍蛇爲災雷師憑而揚沙兮風伯振而板木騰
白日之冥冥兮蠟鬣老而奄忽彼耄耋者何人斯兮
乃中道而跼促杳千古其長夜兮縻百身其莫贖吁
嗟乎鐘期返聽兮絃將絕而曲哀伯樂不可再兮蹇
余駟而徘徊惟寸心之不墜兮知文章之有神旣滋
蘭且攬菹兮或靈修之所憑挹蘭漿以酌卮兮攄哀
些以敷辭灑余淚之浪浪兮魂恍惚其來斯來不可

見今入無所謁握手公子今祭獻以咽傷哉人琴今
肝腸欲絕誰者鑒余心之邑邑今恍隔世其如結嗚
呼哀哉尚饗

祭野亭羅公文

嗚呼哀哉日中則昃物虧則全造化弗違人道靡愆
世所崛起人爭自賢不有作者孰知其艱聿觀羅翁
豈不其然翁生英儻矯矯自童雄舉虎眦羣兒靡同
孝平友于天秉其衷委命海上急父獄中年甫十三
有丈夫風厭薄伊吾驅逐三五起家隆隆島夷作楚

挾四婦人棲山隱阻出恐著賊入憂履虎竟全而歸
身刺可數嗚呼哀哉世難旣平天親焉佞生養歿哀
孺慕不移事兄字弟有懷怡怡王修齊範裴叔襲規
嗚呼哀哉奮身振家僉曰教父冲而用之食麤衣布
曰留其餘用篤其祜森森謝樹公植于庭空賈賈服
空儒儒名市而行義文且蜚聲聯珠照乘合璧連城
河源崑崙翁武是繩有子如此空其永生胡天不憫
奄然露零旣盈其虛忽虛其盈茫兮昧兮莫知其情
天不可問人不可憑嗚呼哀哉某等籍附季子禮葬

父行躑躅驥尾企瞻龍光疇推祭酒疇則鄉邦吳山
隕色少微掩苳有淚如雨絮酒是將日翁千秋義問
無疆日翁可俟煥乎封章兩峰之間素魄徜徉

祭卓長季文

萬曆戊子冬十月棲溪長季卓君之逝三年矣靈輿
既東一水不遙素車靡及而友人黃某某未有聞也
愴焉之情無所云托乃束芻醑酒爲文以哭之曰哀
哉歲冉冉其不居兮物靡靡而不返去昭昭而悠悠
兮言念子其獨慄唯疇昔之晤子于玄宮今遂執手

而言宴紛世態之億變兮謂余心之如面慨焉從余
于百里兮指玉溪以爲盟擬蘭紉而金堅兮非獨以
余之脩文余亦愛子之美秀兮實憂子之多能將究
羣書之所極兮懼碌碌而罔成余每切切而逆耳兮
辟良藥之苦口務惔惔其無已兮亦嗟嗟而余受哀
哉天之弗造女兮馮高明以爲才乃眇眇而弗予聽
兮矧重之以禍災彼書之所云孝友兮固上聖之所
脩惟骨與肉其成體兮羗獨于子而多猶嗟盛年之
幾何兮又藥石之強半骨稜稜以就削兮定萬慮之

永斷矯壯心之不已兮奮策馬以圖南余止子實流
涕兮勿金丸而輕彈子絕袂其勿余顧兮將一息而
千里余不幸言而中兮歸來乎竟長臥而不起哀哉
人亦有才兮獨子弗能成其名入亦有季兮獨子弗
能保其身人亦有後兮獨子不能必其子孫哀哉混
世俗之汶汶兮嗟貧交之日難子獨與余而披情兮
固物議之所甘喚人琴兮罔所憑子靈輒其既駕兮
余弗聞草淒淒兮風泠泠瞻子不及兮涕浪浪而沾
襟傷窮愁之莫子酬兮不泯者心所可以報子兮庶

沒世而有稱令千秋之知有余兮爲卓季之友生世
或賤日而申申以訾予兮子其鑒余于冥冥

祭王元美大司寇文

嗚呼歲在龍蛇天傾東南國老竟殲斯文云殘人倫
失宗薄海涕淚誰不公哀強爲公慰維天生材予齒
去角嗚呼我公協氣光嶽維天錫福忌盈虧全嗚呼
我公令德終年馬遷無詩公詩罕儔上邈風雅下躡
曹劉初中盛唐沂爲支流李白無文公文鮮倫凌鏢
百代先秦西京漬沫瀉潤南陽廬陵濟南偏禮北地

方駕狎主齊盟漸被華夏大兒文舉小兒德祖攀附
名字不可勝數冰鑑羣哲提衡萬古嗚呼楊雄洵玄
其行則設公行園方與道委蛇東山載駕馳驅三朝
雙屈龍見孰測其高覆盆旣霽弭冠非榮下慰厥考
上報聖明移孝以忠有孚在道處爲遠志出非小草
嗚呼萬物之數無往不旋盍歸乎來弁山之園含笑
從之司馬九原公生有爲公歿不朽微言日星高名
山斗遺澤及世謝玉荀龍蔚爲國華式穀無窮况夫
冥心道妙棲性玄寂蟬蛻天壤千古一夕白雲帝鄉

逍遙何極某等託交令子鴈行龍門末技受憐奇文
共論文則在茲人將安做紫氣沉溟大江潯泆絮酒
東芻聊寫悲仰尚饗

祭江西撫臺夏公文

嗚呼哀哉牛斗掩芒江漢咽流春光黯慘夜色墨幽
木壞山崩公竟弗畱嗚呼哀哉公性石介公行矩方
家肅朝典國凜人綱孝友爲政貞惠孔揚建德系功
敷歷四方嗚呼哀哉古道不作末流萎茅砥柱而立
公實人豪筮仕雲司載起兵曹惟允佐平克詰分勞

泉楚藩晉士悍寇驕啼饑萬口負隅三苗以熾以康
澤渥功高嗚呼哀哉宏略名材稽首咸讓 帝念東
南以昇浙壤海濤沸騰惟公執掌隄峻懇恬桑田無
恙霜稜雪瑩總憲三齊晉轄中洛保障清夷蜚鴻集
鴈斷蛟截犀嗚呼哀哉福亦有緣德亦有圃天若篤
之大江以右刻腎鏡心仁彌澤究巖巖岳伯晝度宵
營萬蠹如洗百賦用平清謝一錢碑誦羣生嗚呼哀
哉時危地重受大投艱建牙仗節公實肩焉澄清撫
察怙地恃天嗚呼哀哉悍宗情兵實繁有族咆哮中

人剗山穴谷民愁有生罹此百毒公獨苦心甦藩童
牯賦薄徭輕無思不厭嗚呼哀哉功大神勞下賤忘
貴君實心誠武侯躬瘁小巫不靈長桑短氣嗚呼哀
哉憐才憂國至死不磨瀝血遺疏垂歿靡佗正襟易
簣匪怛匪訛嗚呼哀哉古稀上壽司馬登壇亦有後
賢鳳毛龍翰乘雲化箕公去何嘆民之孔懷崩心裂
肝人亦有言知已實難某等拮据一官服膺六載護
短錄長祛吝提悔訓我清貞期我遠大嗚呼哀哉騰
也不敏時奉周旋承流仰沫鼓瑟調絃功兮參承匪

獨後焉亮懷敦好有語必宣某獨踈狂矢論放言公
之聽之亦復溫然嗚呼哀哉公儼神明霜嚴坐削某
等何脩春風穆若嗟哉往矣不可復作嗚呼哀哉日
黯轅門雲棲牙燾南浦傷神西州放哭九原莫從百
身曷贖里巷悲纏我哀獨酷芻束徐生招擬宋玉搖
搖素旂江山慘日嗚呼哀哉尚饗

祭楊孺人文

維吾姊楊母黃孺人以萬曆乙巳春正月八之日歿
于鍾陵之官舍越三月十日甲申將駕靈輓而南歸

故靖安令易亭楊公之穴借藏焉其從弟其悲姊之
借來而不借返也治蔬一盂茗一杯禮其道爲文以
哭之曰嗚呼吾姊天厚之耶天厄之耶何所乘者貞
而所遵者奇耶所脩者堅而所乘者幻耶吾再從父
懷溪公亾子而有女三而獨吾姊存生事亾哀靡移
也笄而繼易亭楊公之室自孝廉起家上杭令再令
靖安而姊刻厲茹辛苦家繩準而人冰霜也楊公骯
髒歸林間脩西方之業如老頭陀六時精嚴而姊衣
緇去綺飯麤糲去甘旨叅禮焚誦後公之亾而三十年

如一日也嗚呼斯豈非女而士行婦而丈夫閭內而
域外者乎可不謂乘者貞而脩者堅耶可謂天之弗
厚之耶然而爲良吏婦而弗及翟冠象服以榮也不
歿于夫與子若女之所而歿于余也去吾家吾鄉如
遺而就余千餘里外視鍾陵如歸也值其子病而不
能奔其女呼號踊躄心泣血而不得從也抑何天
之厄之而違者奇而乘者幻之至于斯也嗚呼哀哉
然而堅不可磨貞不可滅奇者爲電光江濤幻者爲
山雲川月土之淨兮何方身之脩矣何缺薄于情而

厚于道短于室而長于穴又奚問途之爲楚而家之
爲越必夫與子若女之親而從弟之爲疎耶羞姊以
水送姊長路姊可以逍遙而游矣吾則不能借姊以
返而水茫茫而山黯黯不能不爲之望西陵而嗚咽
哀哉尚饗

祭海寧居穉恭文

嗚呼哀哉穉恭遠至是耶夫人壽夭仁鄙受命自天
力不得抗亦或人之無良有其自取嘗試論之有三
天術蹈者不免露才傲物則天寵祿過溢則天敗行

傷義澆薄人倫則天三者跡穉恭何當哉穉恭稟才清美而氣柔于處女體貌衣冠恂恂乎不勝也爲省心太守公之仲公子而鹿門先生之館甥食舊居約不減寒俊少穎爲文新爽有氣可一日千里而弱冠乃得補弟子員未嘗馳裘馬湛聲色享名高取數盈也省心公歿于官伯子亦歿帥先二弟喪葬無悔二母乞爭之如一卽寄家練水上未嘗一日輟膝下之禮嘗自飲泣勢有所難不得卽挈妻子歸侍老母嫂撫弱弟沒之前十日從鹽官問跡還孱然病

重

軀尚坐予齋中決筭自樹立脩人倫之業語及傷心
未嘗不浪浪淚下沾襟也嗚呼哀哉予方謂釋恭才
而不盡達天且儲之穀而不盡庸天且饒之人倫之
樂不盡愜天且堅苦而成之將凌雲薄日著芳名于
春秋胡然而奪吾釋恭之速也顏得道而斃賈憂國
而傷釋恭之夭折吾且率二三子問諸天何爲其然
哉將鄙者不必天仁者不必壽耶雖然歿生旦暮也
顯晦幻景也人歿等耳彼天而天者文不掛稅林行
不通鄉族名不齒士大夫之口卽百年何當焉自吾

釋恭之歿昵者哭于寢長者哭于堂士哭于帷所知
哭于野斯知釋恭之文弱好脩在人者未嘗天也釋
恭有兒生三日而孤悲乎釋恭不及見彌月吾乃得
抱見之豐美而堅其後必大又聞之釋恭之內子踊
而服栢舟之篇其伯叔內外兄弟相矢耶翼其孺子
釋恭天其身而昌其世卽謂釋恭不亾可也同門郁
生君武才雋不讓釋恭然身歿而嗣絕釋恭不生聞
乎然則釋恭可以含笑入地矣尚饗

祭兵部尚書太子太保胡端敏公墓文

嗚呼古之賢者生不同時長不同域名位不同埒然
或以其精氣之微激越曠世膠結異區况乎百年之
內同州接壤名列儒林而行不媿有道先生之稱其
爲千年冥契不言可喻宣尼執德鄰之符詩人詠秉
彝之好良有以也恭惟我公天挺傑人風標末季粵
在 武宗逆藩弗靖公晉發其謀忠而被禍繼驗徙
薪之明卒戢操戈之難艱危萬歎慷慨孤直大政大
議嶽立川決控御夷夏盤石皇輿與越之文成忠烈
吾鄉之忠肅三公並樹非常俎豆百代生著駿稱沒

垂鴻謚維茲五雲之阡英魄藏焉高山仰止庸哲同情余小子某浮文姱節跼蹐戶牖上媿白日仰慙先生噫我先考處士鶴州先生白首青衿窮愁布衣名微位卑攀附無從惟是老而篤行貧不受憐傳經繕商瞿之業辭粟高於陵之風範俗有彥方之槩惟孝友于宗黨雍洽與我先妣王孺人貞毅通敏丈夫同操世稱梁孟不媿魂魄小子某行能淺鄙名浮實隕爲先人侈生失菽水之歡沒遵風木之恨五釜弗及一丘是圖天幸黃氏而憐先人之骸骨獲從馮開之

祭酒卜藏山于斯奉王大司馬元美李太史本寧誌
銘其石以是月五日壬申式就窆窆某兩婦沈氏張
氏附焉嗚呼范滂節士願埋晉陽之劍伯鸞高隱空
葬要離之旁所謂精氣之微激越膠結不繫名位不
隔世代則我先人之於公豈其附於德鄰庶幾從厥
攸好云爾若夫有生其盡大塊同域陵谷之移一瞬
千形無敝之道超忽天壤此又達人之所縣解而賢
愚古今皆幻寄也公得無謂余小子庶幾有知而欣
然攜先處士相徜徉於江山之上五雲之深也耶尚

饗

祭西安鄭生文

萬曆丙申夏四月三日明茂才敬宏鄭生翁館靈
鷲山之幻隱僧舍遊子客寄清客弱齡來短去促蜉
蝣此主朝聞之願未愜夕灰之期遙至黯黯爾懷搖
搖爾魂友生黃某及爾同門某某等喪予與慟贖身
無從血淚同傾悲哀莫宣悼汝迷方不知所依乃撥
煩心擬于大招傷往撫存以代號哭其辭曰咄哉人
命生有方只皇降幽墨兔難量只幻世逆旅歿同盡

只胡客胡主游魂變只狐正首丘烏林中只魂乎盍
歸返故鄉只時維孟夏毒氣炎只長木榛榛草莽莽
只北山峰寒慘窳窳只哀猿夜號猛虎嘯只魂乎盍
歸不可居只文園稅林光陸離只多士所甘若汝仇
只魂乎盍歸不可讀只鷲嶺龍泓泉泠泠只疇不考
槃若汝咽只魂乎盍歸不可聽只聞汝王母白皤皤
只倚閭文孫目恍恍只魂乎盍歸息心懷只若翁徬
徨腸百結只若歿若生日九廻只魂乎盍歸假寤寐
只謂我非兒莫我哀只保願強年嗣後來只汝瑟汝

琴風綢繆只腸斷汝別將無生只魂乎盍歸用相存
只明珠在積七月懷只稱未亾人此不亾只魂乎盍
歸默受言只天道無親禍不單只汝子汝女先汝逝
只重泉茫茫白日沉只魂乎盍歸相見樂只古往今
來逝如斯只何陳何新何哲愚只爲壽爲夭不可問
只子淵篤學賈誼材只乃如之人愾夭折只汝則秀
穎不汝延只石火電影疾莫停只隆隆炎炎亾不復
只綿綿神理炯心光只汝斯不昧長往來只汨汨愛
欲生歿輪只哀今之人不可訓只魂乎盍歸佩斯言

只西望始筵江水盈只執手何期淚浪浪只我實有心
遡流從只酌酒隄些靈之鑒只尚饗

祭同年海寧沈子卿文

萬曆丙申某月某日明孝廉子卿年兄卒罹非常變
不于正季弟某等且疑且愕若摧若崩哀時悼命爲
文以弔之曰嗚呼哀哉寥廓園方蒸蒸日上有萬
種人亦于情孰者自取期至而傾昏者追欲烈士殉
名長夜悠悠各行所明飲藥伏劍投淵結纓或孝或
義或勇或清自古有之志慊事平往無飲恨來亦蜚

聲泰山埒重鴻毛比輕輕重佗僚哲人所爭嗟哉子
卿卿何以歿籍籍名流翩翩公子白雪鳳吹青雲鵲
起智亦可圖時亦可俟誰其迫之遽爾至此嗚呼哀
哉寇有外至物有偶遭虎噬蠱毒烈焰驚濤卒然臨
之巧者莫逃曾是聖善曾是劬勞曾是肘腋而起戈
矛曾是狐鼠而乃操刀虜也而吠烏也而號豈其離
裏豈其屬毛嗚呼哀哉天傾地陷白日陰沉搖搖七
尺黥黥寸心進不明志退而裂維有淚如血吞聲若
瘖匹夫溝瀆蘭摧膏焚嗚呼哀哉申恭莫逃棘心若

咽百折魂迷九迴腸絕生而斷哲明歿慕俠烈鵬鳥集
賈汨羅沉屈嗚呼哀哉愛子生在滕生妻在帷豈其無
情棄之若遺我躬不恤遑恤我私人不可懟問諸明
神我罪伊何告于先人抱恨裂肝齋志殞身嗚呼哀
哉孰謂烏慈而化爲鷲孰謂蟻臣而化爲蝮漠漠玄
雲昏昏赤日千秋已矣萬事都畢玉碎璧瑕含哀同
恤贖身亾從憂心怵怵酌酒澌些哭于幽室嗚呼哀
哉尚饗

祭羅長公文

羅長公鶴亭先生辭世之明年爲萬曆丁酉四月朔
辛酉越十有一日辛未諸孤大章大儒輩卜葬桃源
山之陽靈輓朝發有日矣大儒輩泫然血泣而悲形
影之歸休也諸親朋間族遠近會素車而來者相與
歔歔咨嘆哭公之行而悵攀援之亾從也公慈腸篤
誼人也無知則已有知焉靈且不前于是黃生某以
年家世講之好杯酒盃羹耐而祖之曰嗟乎長公公
可以行矣人亦有言人孰無死古來共盡世有載營
魄面目爲人而長久存者乎彼彭聃安在哉世紅顏

而白骨黝髮而黃土者不少公年七十矣俗之所嘆
古稀也亦寧無黃耆老人延日月人間或病伏或斃
煢孤隻或子若孫不才而恩若怨之未平生不歿歿
也不然者卽歿賢于生公有一憾于是乎某卽不文
然狀公之孝友醇懿賢稱長者庶幾不亾公余友比
部朱大復墓上之銘古而核可千秋也此皆世俗人
之所不得也且公之墓左有仲公右來季子所居有
煙霞籠井泉石林木之勝公挾友于而探勝情徜徉
其鄉古之所云樂哉斯丘也又何感焉夫公而無知

則已有知耶聞予言而爽然者可以行矣尚饗

祭王逸李文

嗟乎哀哉大塊之內生人絃絃豈無鼠技誰則龍文
惟子落筆挾霜凌雲亦有淺才薄種厚獲少年天幸
朱輪華轂彼胡以通子胡以阨惟子胸懷跌宕夷猶
代模往哲家風夙朔天下名士半子交游臭味之似
獨子綢繆子負逸儁謂予深老牛耳雞壇白雪玄草
譚屑霏霏意緒了了期子千秋別予胡蚤嗟乎哀哉
子之光子提衡藝場亦多兄弟觸目琳瑯伯高趣肥

仲罹蹇歿謂子千里遠駕鸞讓曾是賦鳴壽不得長
嗟乎哀哉昔子內艱塊臥苦寢斷酒不肉雞骨支枕
又聞子夢就陰息影或曰歿孝或曰逃禪子無異觀
謂俱卓然曾是人損而返于天嗟乎哀哉伯道亾兒
賈誼亾年高才詔時三十不官子于亾境不可謂完
所可慰君不與俗齒第五之名元美之子蕤苑落香
詞林貴紙問奇守玄亦有門士如此而歿可以不歿
嗟乎哀哉子則不歿予實喪朋發言莫賞尊酒誰論
高山咽奏匠石廢斤豐頤秀目雅謔勝情披帷聞寂

宿草露零風流安在涕泣沾巾尚饗

祭凌元禮文

嗚呼哀哉憶昔垂髫師門執經子稱高座予亦接塵
疑義互拆素心相傾藉同博士郡列膠人後來之雋
人譽同聲非以爲聲實有同好玉潤蘭芬規循矩蹈
燁燁丰儀繩繩師表文必討義名無絢華廿年下帷
玄草青霞詣理彌雋愜心去奢體莊詮管漁臘諸家
以子羽毛何難決起以予襟期何難千里矻矻此生
落落一第嗚呼哀哉猴沐鳳冠羊質虎皮人有天幸

子獨數奇良玉未剖大材晚成人有永日子獨辰星
嗚呼哀哉昔余登車與子黯別期子都門凌雪奏雪
豈謂茲時而成永訣秋風折翮聞子淮揚力田逢年
望子心長豈謂名隱而身亦亾嗚呼哀哉白面丹脣
朗吟高論神理斯存音響遐邇絮酒徐孺執紼巨卿
素車獨後嗟我羈人嗚呼哀哉子有令昆謝樹荆田
子有哲嗣奕奕翩翩嗟我喪朋德音莫謾人琴絕矣
牙生輟絃哀哉尚饗

祭鹿門茅先生文

明憲副鹿門茅先生九十翁考終於萬曆辛丑之十
一月武林黃某通家子也官鍾陵令去西吳千里而
遙訃聞以壬寅之正月江山阻脩感愴無從越又二
月閏甲寅乃得絮酒炙雞遣使陳辭以弔於先生之
靈曰嗚呼哀哉維翁山川氣異奎壁星纏直心浩魄
秀目美髯孝友張仲文章子瞻晉憲巖廊遯肥林泉
敲棋揮麈擬於神僊國老屈指伏生比肩荀龍謝鳳
後起翩翩不朽盛名無涯大年雲乘風御又何悲焉
所可悲者噫余小子幾三十年感恩知已憶昔弱冠

毛羽未成翁借齒牙崛起微名斷金琢玉翁父仲兄
操瑟游齊章甫適越范叔一寒卞和三則翁之憐之
相嚮涕雪嗚呼哀哉戊戌之役夢翁棘闈鵲起一第
後翁參差翁喜不已惠書贈詩科名非榮鍾鼎是期
繼予言歸兩拜堂下神氣酣和情語傾瀉三祝萃封
千秋壽葦冠履如雲珠玉紛藉百歲須臾而天弗假
嗚呼哀哉倏忽彭殤瞬且今古生也有涯達者不苦
惟余靡瞻事翁猶父昔也萃堂今也杯土虔刀猶在
牙琴莫鼓嗚呼哀哉吳楚千里江山渺茫羈身一宮

素車靡遑塵案悽心哀而無章浪浪不已聊寫我腸
尚饗

祭萬思默學憲文

嗚呼哀哉大道岐真儒衰而學問之宗晦講者綺辨
矜氣而脩證多缺不講者隨俗狃故而闡繹盡廢其
或鼓或罷遷徙出沒于講不講之間者其故益不可
得而言于是崇無尚玄之論行而高明之士不能不
喜而涉其中某從爲諸生至今廿餘年卽躬之不淑
而所聞見當世者往往而是自承乏鍾陵固知豫章

有萬思默先生者其人閤然好脩冥然實證官學憲而歸三十年沉心靜氣從事于學問之旨者深士處斯道而標軌于東南蓋近在百里之內某所欲爲樞衣承箸乞靈發覆者甚亟自揣狂妄念浮習無可相質塵勞案牘巡逡而止嗚呼哀哉烏知先生之脩然往也不可得而見矣天幸與于斯文長公儀部君偶過禪寺竹林之間相從譚塵媿媿竟日淵停山峻始有所自而因得先生所爲學易齋集與易原約言諸集而讀之彼其指坤復于圖書窺夜息于平旦觀喜怒

哀樂未發之中而證洗心藏密養神智而同憂患之
旨直與易爲體而與周程王陸諸公可同堂而晤然
後知先生三十年所得不輟講亦不涉講卽脩卽證
自覺覺人卽位不稱德用未竟志而微言清範流布
日用俾學道者有所折衷其至而後生小子讀其書
想見其人猶可以息浮歛豔刊支離而墮知解謂先
生卽今在可也悲哉嘗試觀當世之號大慧勇有力
人言成文章動成匡濟平居依氣猶足以讐攝一世
臨命之際牽業繫念不能不隨病現證其去衆人之

散亂恐怖者無幾聞先生易簣時神閑氣壹猶三嘆
于戰兢冰淵之訓而不及其他則平日所謂退藏未
發非徒聲聞影附中實有所持以抱而終已歟烏足
爲先生悲乎某也鄙向旣不得挾策而問先生之言
墻百里之內猶然匏繫不獲以一觴一豆展南州孺
子之慟先生豈其有所冥會而歆荅之雖然青山滿
目白雲流聲夜雨朝暉瑟然作而擘然呈亦不敢謂
先生無所以歆不肖而荅之響也尚饗

祭沈韞所文

人亦有言東箭南金產于江左照耀人倫未聞瓌寶
挺生一門韞奇抱璞特見于君君材蚤慧卓有令聞
雕龍繡虎拔俗逸羣惟時仲季額髮鬢髮笑然何恃
惟君一身父兄師友砥行脩文翩翩鵲起玉季金昆
君捷南宮名上楓宸仲亦同舉顧影而奔季公嗣起
乃亦絕塵三鳳河東並爲時琛鄉邦頌君厥有德音
友愛相成前無古人君之釋褐卽縮通綸剖符東魯
再起西秦聲冠一時譽流百城嗟世多難時方橫征
貂冠虎噬絡繹縱橫君處其間不震不驚嚴毅屹立

劑以調停秦人額手天惠西氓戴若慈母嚴如辨明
城頭種花堂上鳴琴室有空囊獄無冤民勞苦功高
浸灌仁深惟 帝簡在璽書被徵春曹蘭省領誦冠
紳氣求聲應天涯比鄰感時喟事君有深心憂國之
容有感其顰忼慷相許志批逆鱗吾輩嘆息君誠世
珍以此才識出入禁林從容諷議左右 至尊寧愁
蔽日立散浮雲福澤天下爲舟爲霖抑嘗評君學術
醇真雅操堅白磨而不磷出爲威鳳處亦祥麟吾曹
天幸聯袂盍簪附君豎立恥作浮沉握手過從剖肝

析心曾不逾時二豎相侵世隱人瑞朝隕國禎皇路
未夷蒿目紛紜人之云亾涕淚曷禁况君兄弟並覆
齊芬譬彼三華乃折麟駒撫棺一慟天爲慘陰瞬息
眴眴遂成古今聊薦蕪詞以當招魂君縱騎箕爲我
臨

祭茅薦卿文

吾友水部薦卿以今年閏六月十有三日卒於夏鎮
之官邸光祿寺少卿通家兄劉憲寵禮部主事通家
弟黃汝亨傷手足之若隕痛人琴之俱亾羈身千里

拊棺無從越九月廿一日憲寵以使事行乃得絮炙
雞酒紆瀉沈痛爲文以哭之曰嗚呼哀哉凡今之人
孰無友朋肝膽楚越古道如崩寥寥宇宙知己曷稱
惟吾二人眎子莫逆輔義規仁形駸神浹處則同芬
出且爭烈曾是不天中道訣別嗚呼哀哉昔在戊寅
亨也披襟壬午之春寵乃盍簪譚枕證道潤石斷金
古人比節神明諭心當是之時諛輸繳日子旣先登
兩人嗣出相許馳驅匡扶王室曾兩人存而子莫必
嗚呼哀哉維子事親業紹德新生養歿慕五十如嬰

惟孝友于玉季金昆維子服官起家章丘如古循吏
子弟田疇冠冕一時畏壘千秋亦旣名拜霜風栢臺
忠肝未瀝末俗忌才載躓載起浙川懷來嗚呼哀哉
蠖屈廿載乃得水衡勞生胼手苦節飲水川途枕藉
輿頌驩騰鴻猷方茂箕尾遽昇嗚呼哀哉子情則真
子貌則古子才百練子心萬苦落落穆穆與俗多忤
微吾二人孰知其故嗚呼哀哉惟子文史鏘漢窺秦
逾壯成詩琅然唐聲照俾哲匠恥獵時名不朽孰多
子實先嗚呼嗚呼哀哉論子生平皆可不死問天何哉

子乃至此寵忝京卿倦亦欲止亨甫儀郎俗乃翁訖
荆棘滿眼虎豹負嶠江河東流風雪載途天道不測
人綱誰扶生而無益不如子狙子身則狙子德不孤
維予二人誰則爲徒嗚呼哀哉寵老無兒亨兒不哲
子有諸孤駸駸汗血痛子臨終書來訣絕搖搖幽魂
戀戀丹穴維吾猶子其能是憇與子季昆左右提挈
子不竟施昌明弗絕子可以歿我難爲別酌酒放哭
心酸氣咽嗚呼哀哉

祭山陰朱相公文

嗚呼哀哉人間世所適來而不能却者富貴所必至而不能逃者死生固萬物之大常而于公平益有可憑方公之從宗伯入貳端揆也望嶽立而品水瑩海內且拭目公將伊周比烈而夔龍遜清午未以來漸秉國鈞逢時事之盤錯承 聖主之神明所入告者不可知而匡扶者不盡行則亦難乎補仲山之袞而調傳說之羹卽公所鬱鬱自謂良工之獨苦而人言藉藉若致憾于缺陷之未平至于公數求去 主眷彌殷徘徊 闕下誰剖其誠于是平身若羈繼神竭

屏營天摧柱石國謝老成遂不能返東山之駕而儻
忽乎爲此邨之塵嗚呼哀哉富貴朝露生歿浮萍公
如達者奚以悲嗚惟是某等生而同鄉或與公同籍
或與公之子同籍則惡能無去來感愴之情所愧生
絕綱繆而頃者靈旗東指各棲巖枕谷不及素車白
馬臨江山而淚傾蕪語椒漿聊以寫悃素而用昭于
精英嗚呼哀哉尚饗

祭丁右武文

前浙東兵憲參岳右武丁大兄以萬曆己酉三月八

日坐逝于里第之正寢六月友人湯若士以訃音至
年家弟黃汝亨裂肝椎心爲位而哭將齋鏡具涉大
江東生芻攀素車馳赴千里憑棺一慟而羈紲客塵
棲遲病骨涕之無從悲無所託乃以十月巳酉朔越
十有七日乙丑遙遣一介寄之絮炙爲文以哭之曰
嗚呼痛哉公遂至是耶維公稟宇宙間出之才負天
地不平之氣其慷慨歷落之概可以移山嶽貫金石
而不可以入世途其高亮坦直之節可以動四海信
千古而不可以入時貴乃至老歿於睢眦而終其身

於讒言之可畏嗚呼痛哉古今賢豪進退非毀之故
大略如此寧獨於公爲復不爾耶方公爲理漳浦蜚
聲卓異入拜御史抗章觸忌寧黜而蹇母臨而嫺逮
乎東事孔亟赤白交馳 帝曰咨爾守在四夷持節
東海詰戎陳師討我軍實談笑以嬉斯其籌策之所
簡練固以一班可見而其氣意之所橫厲實惟千秋
此時矣惟鼎有寶我仇是卽貝錦爰興芳蘭徒植
帝聞九重而莫扣湖海一身今難測置之東粵存亾
反側天下士無知不知皆爲公扼腕而沾臆乃公豪

氣未除壯心不已脫略公卿文酒自喜托高懷於雲
天寄心知於流水亭也辱公腹心是披於浙之役已
結襟期余令鍾陵時就公居公授我餐我先以詩高
譚移晷遑及其私予旣被命握別凄其十年兄事
敦好靡移離愁不勝淚如綆糜已在長安忽來萋菲
乃公顧有陰爲予防者不遠千里之外而終不令予
知嗚呼痛哉如公於我云胡不思謂仁者其馘穀乃
德徽之永辭聞公永辭無怖無異開門危坐云大奇
事徵公不磨英心銳氣嗚呼痛哉公身已矣公後其

昌公有少子鳳姿鴻翔種玉遺珠喜奇流芳公且食
未盡之報而重新司馬之構堂惟某不天別促情長
如龍無管似鴈失行遽聞公訃涕洟旁皇秋風江漢
落月屋梁病骨無從遙奠一觴生慙鮑管歎范張
公如有知我享我將嗚呼哀哉尚饗

祭劉母羅太夫人文

雲嶠宗伯母

夫人四星連曜七德含美敬愛蒂之天情言容稟乎
典禮方作嬪於鴻碩遂媿美乎麟趾幃政徽音南州
歛起有言斯雍無貞弗履自進贊於君子筦中饋於

家人外齊眉案下拂機塵伐其條枚實稟憂勤之德
友其琴瑟彌深節儉之心夫何連理中斷琴瑟罔終
巴清遜其操尚湛母踵其芳蹤廬江截髮河東九熊
勞勞令母嶽嶽師傅靈根流彩於木天白壁增光於
玉署自任以重隱然負海之六鰲獨立不移屹若擎
天之一柱夫人焉依或從或留從則資事母以事君
輸傳巖之獻納留則移作忠而作孝奉潘輿以夷猶
于是 綸綍覃恩 詔 衎 荐 被 夫 人 雅 操 言 白 其 賁 浣
濯 是 衣 鉛 華 不 御 閑 家 之 範 靡 渝 過 庭 之 聞 弗 替 憶

某爲令咫尺高堂詰嗣忘分故人將陳三祝之宰
惊稱百年之霞觴爰揭蕪穢錯綜琳琅抽揚鄙詞以
媿辰良曾幾何時而掩婺光胡厭朱門而遊玄馬蘭
凋翠畹鸞辭丹穴靈爽於昭華顏衰歇槐陰論道將
調鹽梅之羹讓草隕霜忽嘔竹林之血嗚呼哀哉某
於令嗣謬託心契惻聞母訃慨焉揮涕匪爲母哀爲
世攸繫卽長輿生孝爲天下以自珍而司馬未相嗟
國事其誰濟某伏丘壑聯結貞魂誅德不盡執紼無
門生芻一束絮酒一尊靈兮勿吐庶其鑒存

寓林集卷之